



Kraj akcije koja je počela još 2013?

Tužilaštvo i UIO BiH davno su proveli akciju Master, a i ova jučerašnja odnosi se na carinske malverzacije

MIREN ALJIĆ I JASMIN TAJIĆ

Po nalogu Tužilaštva Bosne i Hercegovine i u koordinaciji dva tužioca iz Posebnog odjela za organizirani i privredni kriminal i korupciju, nekoliko stotina policijskih službenika **SIPA**, Granične policije BiH i UIO BiH jučer rano ujutro počeli su pretrese i uhapsili nekoliko osumnjičenih za kaznena djela organiziranog kriminala, carinskih i poreznih utaja sa koruptivnim elementima.

U ovom trenutku se procjenjuje da je budžetu naše države kroz kriminalne aktivnosti ove grupe nanesena višemilionska šteta.

Pretres objekata

Akcije kodnih naziva Master i Truck su se provodile na području Sarajeva, Brčkog i tuzlanske regije, pogotovo Gradačca i Srebrenika, i odnose se na veći broj fizičkih i pravnih osoba, koje se sumnjiče za organizirani kriminal vezan za nezakoniti uvoz tekstila iz inozemstva na područje BiH.

- Postupajući po naredbama Suda i Tužilaštva BiH, SIPA je počela pretrese većeg broja stambenih i poslovnih objekata na više lokacija na području Banje Luke, Gradiške, Sarajeva, Tuzle, Srebrenika, Gradačca i Brčko distrikta. Pretresi se provode u sklopu koordinisane akcije u dva predmeta, u kojima su obrađene i djelimično istražene dvije grupe za organizovani kriminal, za koje postoje osnovi sumnje da su tokom prethodnih godina iz Republike Turske, Mađarske i Italije vršile uvoz tekstilne i druge robe, pritom vršeći krivično djelo organizovani kriminal u vezi sa krivičnim djelima porezna utaja i pranje novca, saopšteno je iz SIPA.

Akcija kodnog imena Master, ona koju Tužilaštvo provodi zajedno sa Upravom za indirektno oporezivanje, traje već nekoliko godina u dijelu koji se odnosi na carinske malverzacije. Akcija Master zapravo je nastavak priče koja je počela još 2013. godine, a koju, kako saznajemo u UIO BiH, Tužilaštvo BiH sada privodi kraju. Tek na suđenju trebale bi se obznaniti sve veze tada uhapšenih u Tuzli, Srebreniku i Brčkom, a potom 2015. godine u Tuzli, Bijeljini, Sarajevu, Brčkom i Zvorniku, te ovih koji su bili meta jučerašnje akcije.

Kako nezvanično saznajemo, jučer su pretreseni objekti u vlasništvu fudbalskog menadžera Admira Husarića i advokata Hajrudina Škahića u Srebreniku, te Nusreta Mustabašića i Miloša Jakovljevića u Banjoj Luci, kao i Ferhata Peštalića.

Peštalića je ranije u svjedočenju spominjao i Kemal Čaušević, optuženi bivši direktor Uprave za indirektno oporezivanje, a dovodio ga je u vezu sa ranije hapšenim i osuđivanim za utaju poreza i prevare Sedinetom Karićem, zvanim Sido, iz Srebrenika.

- Sto se tiče firme Eko-Skobić, pokazalo se vremenom da je to firma preko koje je radio Sido Karić iz razloga jer je bio u zatvoru, a na temelju rada Tužilaštva gdje smo mi iz UIO pomagali, pa je na taj način prikrivao djelatnost. Prema informaciji koju sam dobio, Peštalić je taj koji je završavao poslove za firmu Eko-Skobić, a Ferhat Peštalić je Sidin igrač, tačnije radio je za njega, naveo je u svjedočenju Čaušević.

Sedinet Karić Sido, koji je ranije, kao vlasnik i direktor firme Sidoil iz Srebrenika, osuđen na petogodišnju kaznu zatvora zbog šverca tekstilne robe u BiH, tim se nastavio baviti i dok je bio u Kazneno-popravnom zavodu Tuzla. Međutim, ova kriminalna organizacija se ne dovodi u vezu sa slučajem Pandora, u kojoj je uhapšen Kemal Čaušević.

Kroz dvije akcije prikupljeni su dokazi koji pokazuju da su navedena krivična djela rađena u kontinuitetu tri godine.

- U toku ove dvije akcije prikupljeni su dokazi da su osumnjičeni kaznena djela činili kontinuirano, a da je iznos utajenih poreznih i carinskih dažbina po jednom kamionu dostizao nekoliko desetina hiljada KM. Prema ovim informacijama, procjenjuje se da je navedenim organiziranim kriminalom budžet BiH oštećen za velike novčane iznose, saopšteno je iz Tužilaštva BiH.

Ratni vozač

Inače, Admir Husarić javnosti je poznat po tome što je prijetio borcima na protestima u Srebreniku 2014, a javno ga je za to prozvao Fadil Duranović: "Jedan od tih najvećih kriminalaca je Admir Husarić, ratni vozač načelnika opštine, koji je poslije rata nekim slučajem postao milioner. Tog čovjeka najviše prozivam i on pokušava da me zastraši. Međutim, nije me uspio zastrašiti."

Husarić je menadžer sa licencom Nogometnog saveza BiH i bivši direktor sportske dvorane u Srebreniku, koga je Nail Salamović 2009. godine optužio da je kamatar, a istom Salamoviću je prijetio smrću i silovanjem. U septembru 2016. je navijaču Slobode Nedžad Gušiću prijetio "metkom u cijevi".

Sve aktivnosti su se provodile pod nadzorom postupajućih tužilaca BiH, u saradnji sa **SIPA**, Graničnom policijom BiH i UIO BiH, te uz podršku MUP-ova Tuzlanskog, Sarajevskog, Zeničko-dobojskog i Srednjobosanskog kantona, MUP-a Republike Srpske i Policije Brčko distrikta BiH.

Sve aktivnosti su završene u toku jučerašnjeg dana, a osumnjičeni koji su lišeni slobode bit će privedeni postupajućim tužiocima, gdje će biti ispitani i odlučit će se o daljim aktivnostima u vezi sa mjerama pritvora ili mjerama zabrane za osumnjičene.

Husarić je u fudbalskim krugovima poznat kao menadžer koji kontroliše cijelu Premijer ligu BiH



Admir Husarić (u sredini)



Na terenu je jučer bilo nekoliko stotina pripadnika sigurnosnih agencija